



Isumaginninnermut Naalakkersuisoq
Medlem af Naalakkersuisut for Sociale anliggender

Storm Ludvigsen (IA)
Inatsisartuni ilaasortaq

§ 36 naapertorlugu Inatsisartunut ilaasortap Storm Ludvigsenip (IA) apeqqutaanut akissuteqaat.

Angerlarsimaffeqanngitsut atugaat pillugit

Inatsisartunut ilaasortap Storm Ludvigsenip inuiaqatigiinni kalaallini angerlarsimaffeqanngitsut inissaqanngitsullu atugarisaannut soqutiginninneranut qujarusuppunga.

Inatsisartut Suleriaasianni § 36, imm. 1 naapertorlugu Inatsisartunut ilaasortaq allakkatigut 15. juli 2009-meersutigut apeqqutinik imaattunik saqqummiussaqqarpoq:

1. Inuit angerlarsimaffeqanngitsut, illumik iserfissaqanngitsut qanoq eqqarsaatersuutigineqarpat?

2. Angerlarsimaffeqanngitsutut nalunaarsorneqarsimasut tunngavigalugit atugaannik pisariaqartitaanillu misissuigivineqarnissaanut pilersaaruteqartoqarnerluni?

3. Qanoq ajornartorsiut qaangerniarlugu pilersaaruteqartoqarpa?
Apeqqut 1 aamma 3 ataatsimut akineqassapput, taakku imminnut atassuteqartutut nalilerneqarmata.

1 aamma 3 pillugit:

Innuttaasunut inissaqanngitsunut pisortanit ikiorsiissutinik inissamillu tunniussinissaq kommunit suliassaraat, taamaakkaluartoq tamatumunnga tunngasut pillugit paasissutissat annertusarneqarnissaat pissutsinillu nukittorsaanissaq Naalakkersuisut soorunami kissaatigaat.

Naalakkersuisut kommuninut allakkiorlutik aallartereerput, taakkunatigut innuttaasut ineqanngitsut ajornartorsiutigineqarnerat Naalakkersuisunit eqqumaffigeqquneqassalluni kiisalu suliassaqqarfimmi kommunit qitiusumillu allaffeqarfiup akornanni suleqatigiinnerup annertusarneqarnissaannut kaammattuutigineqassalluni.

Pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi § 3 naapertorlugu innuttaasut kikkulluunniit Kalaallit Nunaanniittut

J.nr. 26.21.03
Dato 10.08.2009

Postboks 260
3900 Nuuk
Oq/tel +299 34 50 00
Fax +299 32 45 47
in@gh.gl
www.nanoq.gl

tassanngaannartumik pisariaqalersitsigunik pisortanit ikiorserneqarnissaminut pisinnaatitaapput, taakku namminneq ilaqtaminnillu inuuniarnikkut pisariaqartunik namminneq pissarsisinnaatinnagit. Tassanngaannartumik pisariaqartitsilerneq ima paasineqassaaq pisoq siumut naatsorsuutigineqareersimasinnaanani aammalu pineqartut ima atugaqarlutik ilaqtariit ikiorneqanngikkunik perlersinnaasut aamma/ imaluunniit inissaarussinnaasut imaluunniit allatut pisariaqartitsileriaataarsinnaasut.

Taamaalilluni isumaginninnermut inatsimmi atuuttumi inissaqanngikkallartunut tapiissuteqarnissaq pillugu aalajangersagaqarpoq.

Pisortanit ikiorsiissutit pillugit Inatsisartut peqqussutaanni § 4 naapertorlugu innuttaasooq pilersornissamut aammalu aningaasartuutitut aalajangersimasunut aammalu pisuni immikkut ittuni pisortanit ikiorsiissutinik pissarsissaguni aalajangersimasumik najugaqartuussaaq aammalu Kalaallit Nunaanni innuttaasut allattorsimaffianni nalunaarsorneqarsimasalluni. Aalajangersimasumik najugaqarfigisaaq ima paasineqassaaq tamanna tassaasooq sumiiffik innuttaasup sulingiffeqarnermini, sulinerminut atatillugu angalanermini, napparsimanermini assigisaaniluunniit aammalu pisattaminik qimatsivimmini siniffigisartagaa.

§ 4-p ataani aalajangersakkat eqqarsaatigalugit angerlarsimaffeqanngitsut kommunini innuttaasut nalunaarsorsimaffianni inissarsiortutut nalunaarsorneqarajupput.

Allakkiami Naalakkersuisunit kommuninut piaartumik nassiunneqartussami pissutsit siuliani allassimasut kiisalu kommunit innuttaasunut ineqanngitsunut angerlarsimaffeqanngitsullu akisussaaffeqarnerat eqqumaffigeqquneqassapput.

Innuttaasut inuiaqatigiinni aqqissugaaneq pissutigalugu kiisalu tarnikkut inuttullu inuuniarnermi atugarisanik pissuteqartumik ineqanngitsut immikkoortinneqarnissaat pingaaruteqarmat Naalakkersuisut oqaatigissavaattaaq. Pineqartut taakku marluk amerlaqatigiingajattut nalunaarusiap Isumaginninnermut Naalakkersuisoqarfimmit 2008-mi suliarineqartup takutipkaa. Taakkuli ajornartorsiutit nalaataat assigiinngitsorujussuusarput.

Siunissami ilaatigut annertunerusumik misissuinissamut, iliuuseqarnissamut pilersaarusiornissamut assigisaanilluunniit iliuuseqarnissamut pissutsit tamakku aalajangiisuussapput.

Suliniuteqarfissat pineqartumut attuumassuteqartut:

Inuiaqatigiinni ineqarnikkut pissutsinik pitsanngorsaanissaaq aammalu inissaaleqisut angerlarsimaffeqanngitsullu atugaat suliniuteqarfigineqarnissaat siunertaralugu ilaatigut inissianik nalinginnaasunik amerlanerusunik pilersitsinikkut ineqarnermut aningaasanik amerlanerusunik ukiuni aggersuni Naalakkersuisut aningaasaliissuteqarniarput.

Aammattaaq suliffissat amerlisarniarlugit – pingaartumillu suliffiit assigiinngitsut amerlanerusut pilersinniarlugit suliniuteqarneq Naalakkersuisut nukittorsarniarpaat, taamaalilluta assersuutigalugu siusinaartumik pensionisiallit qajassuunneqartariaqarluni suliffinnik imaluunniit piffissat nikittaallugit suliffinnik neqeroorfigineqarsinnaaqqullugit. Tamatumunnga atatillugu piginnaangorsaqinnissamik allamillu ilinniagaqarnissamik neqeroorutigineqartartut atuuttut nukittorsarneqarnissaat pisariaqarpoq.

Angerlarsimaffeqanngitsut ikilisarniarlugit suliniutinik ineriartortitsinermut pilersarusionermullu atatillugu suliniuteqarfissat siuliani allassimasut qitiutillugit aallunneqartariaqartut Naalakkersuisut ilisimaaraat.

Najukkani suliffissarsiuussisarfiit aqutigalugit kommunit annertunerusumik suliniuteqarnerat angerlarsimaffeqanngitsut sulileqqinnissamut piareersarneqartarnerannut pitsanngoriaataasimasoq Naalakkersuisut isumaqarput, tassami aalajangersimasumik suliffeqarniaraanni innuttaasut ataasiakkaat namminneq ineqarnissaminnut aalajaatsumik inuuneqalernissaat pisariaqarajummat.

2 pillugu:

Akilerartarnermut atugarissaarnermullu ataatsimiititaliarsuarmik pilersitsiniarlutik Naalakkersuisut maanna suliniuteqarput, taanna ilaatigut inuuniarnikkut ineqarnikkullu tapiissuteqariaatsinik taakkulu imminnut ataqatigiinnerannik misissuineramik ingerlatsissalluni. Taamatut suliniuteqarneq innuttaasunut taaneqartunut iluaqutaasinnaavoq.

Aammattaaq annikinnerpaaffissat aammalu inuuniarnikkut nikingassutsit pillugit suliniut Isumaginninnermut Naalakkersuisoqarfimmi aallartinneqarpoq. Suliniummi tamatumani siunertarineqarpoq inuiaqatigiinni kalaallini piitsuunerup naligiinnginnerullu qanoq annertutiginerata ersarissarneqarnissaa, pinaveersimatinneqarnissaa naggataatigullu annikillisarneqarnissaa. Piitsuussutsimut pissutaasut arlallit qulaajarneqarnissaat suliniummi anguniakkat aamma ilarissavaat.

Kommunip angerlarsimaffeqanngitsunut unnuisitsisarfianni angerlarsimaffeqanngitsunut unnuiffissanik ukiuni arlalinni Sermersuup Kommunian neqerooruteqartarpoq. Pisuni arlalinni inissat tamarmik atorneqartarput, taamaattumillu Nuummi pisariaqartitsisoqartoq inerniliunneqartariaqarpoq. Neqeroorutip tamatuma siunissami annertusarneqarnissaa aaqqiissutaasinnaavoq peruserlu tamanna kommuninut allanut ingerlateqqillugu. Innuttaasunut angerlarsimaffeqanngitsunut unnuiffissanik siunissami kommunit qanoq pilersitsinnaanerit pillugu Isumaginninnermut Naalakkersuisoqarfiup KANUKOKA oqaloqatiginiarpaa.

Angerlarsimaffeqanngitsut pillugit nalunaarusiamik suliarinneqqullugu Ilaqutariinnermut Peqqissutsimullu Naalakkersuisoqarfiusimasoq 2008-mi Ilaqutariinnermut ataatsimiitsitaliamit piumaffigineqarpoq. Angerlarsimaffeqanngitsut taakkulu qanoq amerlatiginersut nalunaarusiami

nassuiaatigineqarpoq. Nalunaarusiarli malunnarpoq suliap naqqa tikillugu misissornissaanut immikkut sulisunik aningaasanillu atuiffiusimanngittoq.

Naalackersuisooqatigiinnermut isumaqatigiisummi sukumiisumik misissuisoqarnissaanik Naalackersuisut neriorsuuteqarput, tamatumalu piviusunngortinneqarnissaa Naalackersuisut soorunami suliniutiginiarpaat. Tamatumunngali peqatigitillugu isumaqarpugut marloqiusamik suliaqassanngitsugut. Taamaattumik ataatsimiititaliarsuup suliniutaasa piitsuussutsimillu misissuinerup ineneri utaqqimaarniapagut, taakkulu aallaavigalugit angerlarsimaffeqanngitsut inissaaleqisullu pillugit ajornartorsiutit naqqa tikillugu misissorneqarnissaat siunertaralugu suliaqarniarluta. Iternge tikillugu misissuisoqassapat suliamut immikkut ittumik aningaasaliissutissanik immikkoortitsisoqassasoq naliliivugut.

Ikinngutinnersumik inuulluaqqusillunga

Agathe Fontain (IA)

Isumaginninnermut Naalackersuisuugallartoq